

2024-mut Nunatta Karsiata naatsorsuutaata akuersissutigineqarnissaannik siunnersuut
(Aningaasaqarnermut Akileraartarnermullu Naalakkersuisoq)

Akissuteqaat

Aappassaanneerneqarnera

Naalakkersuisut sinnerlugit Kukkunersiuinermut Ataatsimiititaliaq 2024-mut Nunatta Karsiata Naatsorsuutaanut isumaliutissiissuteqarneranut qutsavigaara.

Naalakkersuisut naammagisimaarlugu maluginiarpaat ataatsimiititaliap isumaqatigiittup 2024-mut Nunatta Karsiata Naatsorsuutaata akuersissutigineqarnissaannik siunnersuutip akuerineqarnissaa inassutigigaat.

Naalakkersuisut aammattaaq naammagisimaarlugu maluginiarpaat Nunatta Karsiata kukkunersiuisuata 2024-mut Nunatta Karsiata Naatsorsuutaa nangaassutitaqanngitsumik uppernarsaasersimagai, tamatumanilu naatsorsuutit ataatsimut isigalugit Namminersorlutik Oqartussat aningaasaqarnikkut inissisimanerannik eqqortumik takutitsisut uppernarsarneqarpoq.

Kukkunersiuinermut Ataatsimiititaliap oqaaseqaatai

Kukkunersiuinermut Ataatsimiititaliap isumaliutissiisummini Nunatta Karsiata kukkunersiuisuata oqaaseqaatai misissorsimavai aammalu eqqumaffigineqartussat peqqussutigineqartullu arlallit oqaatigalugit.

Naalakkersuisut ataatsimiititaliaq sukumiisumik suliaqarsimaneranut qutsavigaat aammalu 2024-mut kukkunersiuinermi oqaaseqaatinik nutaanik qaqitsisoqarsimannginnera ataatsimut isigalugu neriulluarnartutut isigalugu.

Naalakkersuisut tamatuma saniatigut naammagisimaarlugu oqaatigaat, suliassaqaarfinni arlalinni siumut ingerlasoqartoq, ilanngullugu ilaatigut kommuninut naammassiniagassat naligiissaarneqartarnerannut tunngatillugu. Ataatsimiititaliap aammattaaq pisiniartarfinnut akiitsut naligiissaarneqarnerat pitsaasumik maluginiarsimavaa, tassani akiligassaqaarfinniittut akiligassalinniittunit malunnaatilimmik annikillisinneqarsimallutik.

Ataatsimiititaliaq taamatuttaaq ESU-mit aamma BSU-mit taarsigassarsiarititanik aqutsineq pillugu pitsaasunik oqaaseqaateqarpoq, tassani taarsigassarsititsisarnermut periaaseq nutaaq ingerlanneqalersimammat, aammalu suliat ingerlaneri misissorneqarsimallutik maleruagassanullu atuuttunut naleqqussarneqarsimallutik.

Naalakkersuisut peqatigisaanik Kukkunersiuinermut Ataatsimiititaliap isornartorsiugai peqqusissutigisaalu tusaatissatut tiguaat. Tassani pingaartumik pineqarput IT

suliassaqarfimmi atuisut isersinnaaneriniq aqutsinerup nukittorsarneqarnissaanik
pisortatigoortumillu atuisut aqunneqarnerannut suleriaasiliornissap pisariaqartinneqarnerat.

Naatsorsuutini nassuiaatit aammalu aqutsisut nalunaarutaasa pitsaanerulersinneqarnissaannut
inissaqartoq Naalakkersuisut akuersaarpaat, tassani aningaasaliissutit, ingerlatassat angusallu
misissoqqissaarneruneqartarnissaat ataqatigiinnerunissaallu Naalakkersuisut
tunngavissinniarpaa. Aqutsisut nalunaarutaanni aningaasanut inatsimmi ingerlatassatut
siunnerfiit angusallu piviusunngortinneqartut imminnut ataqatigiinnerusariaqaraluartut
Naalakkersuisut taamaalillutik isumaqatigaat.

Efterskolini atuartut affai sinnerlugit ikerinnakkut uniinnartarnerat ernumanartillugu
ataatsimiititaliap oqaatigaa. Ataatsimiititaliaq isumaqarpoq aningaasaliissutit atorineqarneranni
atuartut atuarnerminnik ingerlatsiinnarnissaannut iluaqutaasumik atorineqarsinnaassagaluartut.
Uniinnartartut procentinngorlugu amerlassusaat ernumanartumik qaffasissaq Naalakkersuisut
isumaqatigaat aammalu suliniutissanik naleqquttunik isumaliuteqarniarlutik.

Kiisalu Campus Kujallermi ingerlatsinermik kukkunersiuinerup aallartinniarnarata
arriippallaarneranik ataatsimiititaliap isornartorsiuinera Naalakkersuisut pimoorullugu
maluginiarpaa. Ingerlatsinermik kukkunersiuineq sukkanerusumik ingerlanneqassasooq
ataatsimiititaliap peqqussutigaa. Suliassaq taanna piaartumik inernissaa siunertaralugu
pingaarnersiuinermi salliutinneqartariaqaraluartoq Naalakkersuisut isumaqatigaat.

Kukkunersiuinermut Ataatsimiititaliap kukkunersiuusumik nutaamik inassuteqarnera

Naalagaaffimmi akuersissummik allagartalerneqartoq kukkunersiuinermut
ingerlatseqatigiiffik BDO, 2026-mut Nunatta Karsiata naatsorsuutaannik
kukkunersiuinissamut Kukkunersiuinermut Ataatsimiititaliap inassutigimmagu,
Naalakkersuisut tamanna naammagisimaarlugu tusaatissatut tiguaat. Naalakkersuisut
peqatigisaanik maluginiarpaa Inatsisartut Siulittaasoqarfiat isumaqatigiissuteqarfigalugu
Nunatta karsiata naatsorsuutaannik kukkunersiuisarneq 2025-mit BDO-p tigiiriissagaa.

Naalakkersuisut tamanna neriulluarnartutut isigaat aammalu kukkunersiuinermut
suliffeqarfimmut najukkami inissisimasumut nuunnissaq tikilluaqqullugu.

Naggasiutigalugu oqaaseqaatit

Kukkunersiuinermut Ataatsimiititaliap sulinera pilersitsiviulluarmillu suleqatigiinneq
ataqqillugu Naalakkersuisut oqaatigerusuppaat.

Isumaliutissiisummi oqaaseqaatit Namminersorlutik Oqartussani aningaasaqarnermik
aqutsinermik, nakkutiginninnermik ingerlatsinermillu nukittorsaalluni ingerlaavartumik
sulinermi ilaatinneqassapput.

Nunatta Karsiani aningaasat sunniuteqarluartumik, paasiuminartumik akisussaassusilimmillu
ingerlatsiviginissaat qulakkeerniarlugu Naalakkersuisut siunnerfilimmik sulinertik
ingerlatiinnassavaat.

Taamatut oqaaseqarlunga siunnersuut Inatsisartunut kajumittumik aammalu naggasiutaasumik
aappassanneernejartussanngorlugu suliassanngortippara.